


司馬文正公集



PL  
2684  
A.1  
1744  
V.15







司馬文正公集卷之五十七

臨汾後學劉組曾重鐫

春帖子詞

皇帝六首

肇履璿璣歷重飛  
緹室灰寒隨土牛  
盡暖應斗車回

二

鸞路迎長日  
農祥正曉天  
九垓同燠沐  
萬物向蕃鮮

三

盛德方迎木  
柔風漸布和  
省耕將效駕  
擊壤已聞歌



司馬文正公集 卷五十一  
四  
候鴈來歸北寒魚陟負冰相烏風色改暘谷日華升

五

浮陽蒲野白溶溶澤底山椒淑氣通草木豈能知造化一  
華一葉盡天功

六

漠然天造與時新根著浮流一氣均萬物不須雕刻巧正  
如恭已布深仁

太皇太后閣六首



盛德初臨震陽和已動坤發生天施大厚載母儀尊

二

種桃臨玉井裁勝刻金花借問此何處崑山王母家

三

長樂曉鍾殘皇輿入長安東風猶料峭冒絮禦餘寒

四

慶壽風烟接未央飛樓複道鬱相望春來無以銷長日閑

取經書教小王

五



司馬文正公集 卷五十一  
冰澌半解波先綠柳葉未生條已黃四海澄清天子孝朝  
回日奉萬年觴

六

東宮歸政五年餘隱几時觀黃老書禁闥無爲民自化熙  
熙不獨在春初

皇太后閣六首

母德思齊盛天心奮豫初青暉凝輦路佳氣擁宸居

三

暖日初添刻柔風乍襲衣弄孫時哺果觀織屢臨機



三

膾肉紛銀縷蘭芽簇紫茸大官遵舊俗歲歲與今同

四

釵上花開海鷺飛紅繒翦萼蠟粘枝風前飄蕩參差羽還似瑤箱呈瑞時

五

玉漏聲殘金殿開乘輿清蹕問安來盡將草木欣欣意同與新春入壽盃

六



詩集卷五十一  
裁縫大練成春服慈儉由來性所鍾肯使外家矜侈靡車  
如流水馬如龍

皇后閣五首

種陸獻新種褱褕澣舊衣玉鈎隨步輦行看採桑歸

二

樛木猶藏葉夭桃未作花六宮歌逮下四海詠宜家

三

溝暖冰初斷牕晴雪半消餘寒不足畏塗壁盡芳椒

四



寶勝金幡巧鬪功  
綵花蠟鷺颺和風  
玉盤翠苴映紅蓼  
捧案朝來獻兩宮

五

春衣不用蕙蘭薰  
領緣無煩刺繡文  
曾在蠶宮親織紵  
方知縷縷盡辛勤

夫人閤四首

璧帶非烟潤金鋪  
霽景鮮繡功  
添采縷和氣入繁絃

二

翦綵催花發開簾  
望鷺歸藏鬪  
新過臘習舞競裁衣



三

綺窗繡戶又東風  
丹夜遊陪歲歲同  
但願太平無限樂  
何須三十六離宮

四

聖主終朝勤萬幾  
燕居專事養希夷  
千門永晝春岑寂  
不用車前插竹枝

樂詞

樞密院開啟聖節道場排當詞

散念



紫電流樞元聖誕膺於丕運妙花雨地輔臣祇奉於仁祠  
憑不垢之勝因祐無疆之遐算仍修高會共洽多娛宜盡  
從容式昭慈惠

夔龍滿座集儒紳花雨仍添一日春欲識華胥何處在只  
應近與醉鄉鄰

作語

德水澄瀾上聖應期而降誕崇丘儲粹大賢名世以挺生  
蓋精神之會昌若符契之相合必資同德用底太寧恭惟  
尊號皇帝陛下容覆如天照臨若日躋羣生於富壽之域



納庶俗於仁讓之塗雷雨弗迷魚鼈咸若伏惟某官某官  
不宣忠力克壯遠猷筦樞機而均四時撫韜鈴而制八狄  
屬呈祥於里社冀徼福於香城大啟梵筵同祈睿算玉毫  
珠髻旣瞻仰於慈雲寶案金觴仍涵濡於湛露肴羞交錯  
笙磬駢羅仁澤釀於惠風喜色饒於淑氣某謬參樂吏獲  
對台廷不揆蕪才敢獻口號

華渚流星表聖期宗工齋祓欵仁祠異花散漫承嚴供妙  
樂從容奉宴嬉印綬相鮮金錯落珮環交映玉葳蕤乾坤  
長久南山固此地年年捧羽卮



勾曲

八音繁會七律鈎諧上悅台顏把色合曲

御筵送李宣徽

昭亮

知真定府口號

匈奴舊畏李將軍今日重來幾代孫  
旗尾飄揚山燒裂馬蹄騰踏塞晨昏  
胡兒稽首朝南闕天子垂衣御北門  
幕府事閑刁斗靜碧潭佳景日開樽

作語

天文垂象貴將陪扈於太微地險流形常山控臨於大漠  
矧聖神之御辨懷荒景以嚮風秋塵無驚夜戶不閉眷是



股肱之郡委於心膂之臣某官武節兼人雄規絕衆元戎  
十乘董銳士以啟行清酒百壺命賢王而出餞榮生道路  
威動塞垣駐大旆於近郊留朱輪於清籞某叨居樂部幸  
對台光不揆蕪才敢獻口號

秋風蕭瑟引華旌祖宴高張出斗城玉饌芳菲羅百品鐵  
衣照耀擁千兵驪歌未闕長楊苑騎吹先臨細柳營雨露  
醲恩何以報沙場不惜樹功名

慶文公八十會口號

某聞三王之盛未有遺年五福之先莫如享壽恭惟開府



太師才爲人傑位極帝師黑頭強仕之時已登廊廟黃髮  
老成之日還賞林泉贊熙洽於三朝保康寧於八十太公  
望口餘兩齒猶釣渭濱田千秋身乘小車尙腰相印何曾  
則始爲太宰石鑒則甫拜司空平津之談論多聞方叔之  
謀猷克壯獨兼具美度越前修留守相公鎮撫都畿典司  
官鑰遇唐虞之無事喜稷卨之得朋大啟華筵益祈遐算  
提舉端明惜盛事之難值慕賢者之所爲親邀相車就宴  
甲第跪斟芳醕仰祝椿齡某不揆荒蕪敢獻口號

元勲茂德古無倫海內高賢第一人台席已酬調鼎志磻



溪還作釣魚身師臣首冠三旌貴歲歷行開九帙新願過  
期頤躋上壽飛觴四十有餘春

司馬文正公集卷之五十七終



司馬文正公集卷之五十八

臨汾後學劉組曾重鐫

挽詩

仁宗皇帝挽辭二首

聲教萬餘里文明四十春  
茂勲留信史盛德滿生民  
共適禽魚樂安知橐籥仁  
百年龍馭遠空復仰威神

二

霧曉銅魚躍霜寒閶闔開  
哀聲際海發靈仗拂天來  
別寢嚴虛位重闔闔夜臺  
拍城空有路無復屬車回



英宗皇帝挽辭三首

盛德師堯舜英資肖祖宗太陽光徧照滄海量兼容鴻業  
知能繼齊民望可封如何未五載已上鼎湖龍

二

虹瑞流朱邸童髦侍紫宸簡心天與子授位帝知人學古  
功時敏鈎深道日新宜然三百載民物仰威神

三

諫省臣無狀龍鱗昔屢嬰恩深忘位賤義重覺生輕不正  
誅鋤法仍蒙獎嘆榮百身何足報天造固難名



神宗皇帝挽辭五首

決事神明速任人金石堅天機先兆朕聖度蘊淵泉仁義  
生知性恩威獨化權乾坤無毀息長與大名傳

二

聽政涉中昃觀書度夜分周王忘自逸漢祖不知勤棣萼  
因心友雲章落筆文佗年紬石室光大繼皇墳

三

至德成無象徽名避不居期門弋獵絕步輦宴遊疎錢列  
金釭暗兵嚴武帳虛蓬萊日晏仗猶望駕宮車



四

鰲禁叨承詔金華侍執經微生輕草芥聖澤濶滄溟鹿性  
安林野葵心注闕庭堯雲不可望白首涕飄零

五

式道清行馬靈輶下陞簾雲奔同軌集雨泣兆民瞻石闕  
蒼烟暝松門白露霑戴弓徒隕絕無計附龍髯

光獻慈聖太后挽辭二首

麟閣承家慶軒星應德暉帝猷陰有補嬪則動無違遽就  
蒼梧野空餘大練衣只應彤管在萬古播鴻徽



二

四紀褱衣盛兩朝長樂尊九州貢甘旨萬乘問晨昏明辟  
歸元子嘉謀賚孝孫羣生資后土難答化光恩

相國魏忠獻韓公

琦

挽辭三首

瀛海訏謨定宗祧指顧安鴻勲柱石壯勁節雪霜寒翼亮  
三朝久初終一德完如何未黃髮壟柏已丸丸

二

愛物威容悴憂公宿疹加孤忠貫白日美志掩丹霞行路  
皆惆悵聞風悉嘆嗟英靈覲宗祖猶想佑皇家



三

惻怛動旒展鴻臚葬老臣簫鐃震淦口紉嬰隘漳濱久大  
英名在哀榮異禮陳豐碑紀遺烈長泣鄴城人

相國鄭元憲宋公

庠

挽辭二首

仁聖初承緒敷天籲雋賢得人茲最盛射策獨居先禁省  
英聲遠巖廊至化宣辭榮還故第三事究高年

二

邦光華哀補家寶素書陳東閣簪裾散西芒宅兆新泉臺  
無復曉柏逕不知春獨有高文在芬芳繼古人



相國祈正獻杜公

衍

挽辭三首

舟楫才猷大冰霜德操堅  
陶鈞成茂業書史樂高年  
瞻望簪紳共吁嗟館舍捐  
舉時無異論方信令名全

二

釣玉吳臺舊誅茅梁苑新  
位登華袞貴家似布衣貧  
直道高當世清風遺後人  
千秋寒照日竹帛不棲塵

三

先子同烏府知音誠噉然  
脫纒來拜伏撫首辱哀憐  
迨此泉扃掩空悲塵網牽  
無由懷酒絮撇涕望新阡



相國廣平文簡程公琳挽辭二首

明直君臣合安危將相兼金章四輔貴玉帳萬兵嚴禦侮  
長城隱臨繁利刃銛南山實巖石何以慰民瞻

二

帝誥封泥紫皇墳殺簡青坐談安玉壘專對讐龍庭黼黻  
昭文理冰霜瑩典刑英靈入箕尾終古作天星

相國潁莊敏龐公籍挽辭三首

儒衣臨絕塞廟略運奇兵緩帶羗塵靜靈旗海霧清公心  
結明主陰德庇羣生名遂身仍退人間五福并



二

銘旗遠明滅騎吹去低昂三鼎功名大重泉日月長鶴飛  
來弔客牛臥卜連岡車馬還城郭悲風滿白楊

三

滄波與鄧林魚鳥久飛沉一旦成陳迹何人識寸心高山  
亡景行流水失知音淚盡離東閣歸來破故琴

司徒開府韓國富公

弼

挽辭四首

天祐休明祚時生雋傑臣賢科首多士宰府澤生民煥爛  
三台正冲融四海春欲知甄冶力試問白頭人



二

松漠驕無信漁陽廣聚兵移書侮中國決意背齊盟直氣  
輕輶入英辭左袵驚虜歸烽火滅寓縣復升平

三

大呂功名重鴻毛軒冕輕閑居客愈盛慙出市皆傾溟海  
涵容大龍門謁見榮謙光儼在目慟哭望佳城

四

杖屨還私第精誠在本朝愛君老不懈憂國沒方昭東閣  
秋牢落西芒夜寂寥只應忠亮志氣運不能消



參政正肅吳公育挽詩三首

皇家延茂異鶚立迥無倫高議誰能奪英才自有真驊騮  
寧受縶冰鑑不棲塵試爲咨清論風流第幾人

二

辭華已獨步政治復無前吏不容三穴民皆戴二天於今

知和寡自古愧才偏惆悵棠陰下仁風尙藹然

公再爲陝牧光實陝

人知公之政

三

念昔少年日謬登君子堂重言何以稱厚德不能忘

光昔以文



請見公荅以長歌過有褒嘆

玉塵聲容在泉臺歲月長憑誰寄清淚爲

我灑松岡

北京留守太師王公

拱辰

挽辭二首

盧肇時推重終軍衆共賢何如奪標日未及弃繻年官歷  
清塗徧名居美事先人間福有五視履豈非全

二

昔日程文士

光應舉公發解

中間侍坐賓遊陪慙晚輩待遇過佗

人方歎龍門遠俄驚馬鬣新西園行樂處引領但沾巾

贈太師文公挽辭三首



汾晉地形美古今多鉅賢况承勲烈後宜有慶靈傳著位  
登朝右聲華山衆先起家從此始圭組遂蟬聯

二

美化流民物薰然遺愛多欒公當日社邵父至今歌庭有  
三鱸集門容駟馬過欲知餘慶在公鼎格平和

三

夏屋封何處出田有臥牛蟠根走伊水回首負嵩丘忠孝  
家風備哀榮禮秩優龍鸞舞宸翰萬古照松楸

樞密太傅文恭胡公

宿

挽辭二首



青馬文正公集 卷五十八  
行冠鄉人品文爲學者師黃裳蘊厚德玉律儼清規大節  
人難奪嘉謨世莫知儀刑不可見遺烈滿豐碑

二

徘徊游內禁密勿贊鴻樞陰德加民物清明服士夫天方  
遺一老星忽隕三吳疑從龍髯去來雲在帝都英宗時方上僊

贈太子太傅康靖李公

若容

挽辭二首

黃髮今彫喪蒼生欲奈何散金纔極樂曳杖已成歌十郡  
餘恩在三臺故吏多位崇仍有後五福更爲多

二



鹵簿去悠悠西郊亂葉秋旄翻寒日薄茄咽斷雲愁吊客  
門飛鶴佳城山臥牛靈車今不返洧水自東流

宣徽惠穆呂公

公弼

挽辭二首

奕世台衡貴盈門綬冕榮遐方流惠化殊俗聳威聲宥密  
資忠力安平寄老成遽騎箕尾去何以慰蒼生

二

維嶽人皆仰長城衆所依遠猷方克壯昭世忽長違象設  
儼如在英靈宵不歸唯應令名久竹素藹餘輝

宣徽使文肅鄭公

戡

挽辭二首



青馬先生公集 卷五十八  
璿璣敷帝命金節護邊兵書付將軍制真爲儒者榮扶搖  
方上擊濛汜忽西傾罷市人相弔紛紛滿百城

二

柳絮喪容盛江山故國遙清時獨長往何日重來朝事與  
秋雲斷榮如曉夢消西風虎丘路馬鬣又焦嶢

又代孫檢討

踰

作二首

湖澄翠岫孤勝地古東吳氣象常時秀英靈何世無金閨  
演王綽玉帳綰兵符煒燁照鄉曲從茲益重儒

二



人爲天地客處世若浮休豈有生長在祇知名可留露沾  
寒草晚風嘯白楊秋地下求文友應從顧陸遊

翰林彭學士乘挽辭三首

夙昔遊清貴時流籍重名讎書石渠祕視草玉堂榮吉兆  
虛三鱣凶期告兩楹子雲思故國墳樹必西傾

二

平生對交舊萬日正如初不復知榮賤都能忘戚疎遺靈  
瞻素几僞物屏塗車家事何蕭索空餘萬卷書

三

司馬文正公集 卷五十八 九  
祖奠垂將撤笳蕭儼欲行野寒嘶故馬樹轉出新旌泉路  
幽無底魚燈暖不明如何齋美志鬱鬱向佳城

楊侍郎察挽辭二首

時論歸清德皇心重老臣祖風終鯁直家學本深淳便殿  
談經久安車就第新如何金未盡奄忽棄鄉人

二

憂國心如石當朝有古風掛冠雖在遠遺禮不忘忠飛旄  
西歸洛新阡背倚嵩還令往來客下馬白楊中

王侍郎琪挽辭二首



弱冠獻奇策居然終賈才賦成平樂館歌奉柏梁杯

侍郎天聖

初以江都主簿上書獻十策詔試館職嘗侍宴後苑賦山水石歌首出諸文士獨被褒賞

麗藻留昭世

英遊隔夜臺土中埋美玉誰見不興哀

二

振鷺辭靈沼冥鴻翔太虛清朝解鳴玉舊里掛安車詩酒江山勝園林俸祿餘所忠今不往誰奏茂陵書

鄭侍郎

紆

挽辭

雲夢氣回後比肩生雋豪司農家學富廷尉里門高騏驎昔千里鳳凰今一牢卽邱餘慶在終應呂虔刀

侍讀王學士挽辭二首

石室書編富金華講席重薦紳歸博洽鳴玉稱雍容貳負  
纍囚象戶臣古琢蹤老成今已矣咨訪欲誰從

二

杯應潛蛇影門陰集戴鵲玉樓新記就石櫨舊銘沉篋有  
封巒札籙無遺子金寂寥封馬鬣秋色淨松林

參政尙書文簡丁公

度挽辭二首

鳳蹕遊汾曲非熊得偉人閨臺尤顯重訓誥愈深淳論道  
參黃閣橫經侍紫宸如何天不憖志業未全伸



二

丹闕晨趨退蕭然忘世榮  
閑齋虛自白永日澹無營  
脫落簪纓累沈冥丘壑情  
貪夫誠有激千載素風清

侍讀張學士瓌哀辭二首

喜愠與榮枯居之悉晏如  
稍閑多執筆至老不拋書  
常愧無能極曾霑清論餘  
秋風郭門外雨泣望喪車

二

凶夢歌洹水妖巢集戴鵀  
未嘗餘俸祿無以具衣衾  
袁渙分倉穀翁歸賜府金  
佗年紙固傳寧使令名沉

朝廷以公清貧賻贈

加有

錢左丞

明逸

挽辭二首

煒燁傳家學連翩射策榮走丸過省閣破竹取公卿埋玉  
嗟何早爲山惜未成空令澤宮友相顧淚縱橫

同年致祭者二十二

人

二

象設如平昔升堂不見君尙疑言笑在忽念死生分清論  
千秋雪浮榮一片雲泉臺多少路何處復修文

紫微石舍人

昌言

挽辭二首



地勝岷峨秀時清雋又生楊雄晚得祿何武少知名性有  
圖書癖心忘紱冕榮前年歸諭蜀不使里人驚

二

顧我非君比最爲相得歡平生遊處久美行始終完長夜  
忍埋玉秋霜不借蘭西風濕襟袖空有淚闌干

邵少卿挽辭

北固啟佳城東吳賁德星總帳長寂寞羽扇遂飄零泉燭  
千年碧霜松數寸青慶餘知有在玉樹滿階庭

梅都官

堯臣

挽辭二首

南唐書卷之五十八  
兵形窮勝負史法貫興衰落殊衆恂恂不迂時位卑  
名自重才大命須奇世俗那能識傷嗟止爲詩

二

漆燈無復曙柏徑不知春南紀光華滅中朝俊秀貧淒清  
千古韻寂寞一丘塵異日昭亭下方多瀝酒人

臧郎中挽辭二首

積慶承前烈呈才會聖時薦楊朝有籍治行吏爲師僚友  
皆親譽黎民每去思惜哉違世早志業未全施

二



素履存誠厚虛懷待物真鄉閭昔相接朋友世彌親遺札  
蠅頭細長阡馬鬣新九原那可作空復想音塵

張元常挽辭二首

爲吏文無害臨民政不苛渾金生自美古井澹無波方喜  
風鵬舉旋聞隙駒過善人宜壽考報施定如何

二

秀眉無足驗結轡遽爲災鄉曲三年別江山萬里迴林間  
飛旄入書劒逐舟來墳草枯還綠重泉不復開

王朝議

尙恭

哀辭二首

南唐書卷之八  
卷之八  
場屋推聲價朝紳仰典刑朱衣老卿列白首戀親庭丹壑  
一朝失泉臺萬古局音容宛在目爭免淨飄零

樂易春陽暖孤高秋氣清老惟知自適貧不問爲生京兆  
開阡貴延陵題墓榮如何帝師筆純孝紀名卿

邵堯夫先生哀辭二首

菽藿一簞樂嵩萊三畝寬蒲輪不能起甕牖有餘安高節  
去圭角久要敦歲寒今朝郊外客誰免涕洟瀾



慕德聞風久論交傾蓋新何須半面舊不待一言親講道  
切磋直忘懷笑語真重言蒙聽實佩服敢書紳

先生嘗以予爲腳踏

實地之人

### 哭公素二首

負書遊上國拾芥取榮名雅度津涯濶高文風雨驚忘懷  
翻得謗縱酒遂傷生忍使泉臺客悵悵不自明

### 二

丹旌倚轡車榮辱盡虛無半道驂騑頓先秋蘭茝枯兒癡  
纔過亂親老不勝扶家事今蕭瑟寧將未第殊

哭尚穎

字公楚

操業五常備艱難六極全仲尼難語命裨竈不知天弱女  
飄何許遺文散莫傳官輕史不錄後世孰稱賢

哭劉仲遷父

天下才無幾夫君獨患多高文粲列宿英辯瀉長河榮宦  
成朝夢浮生度尺波舊僚空執酒相與淚滂沱

二

昔醉金明渚今來慧辯祠當年笑相視此日笑殊悲天迥  
川原淨風高草木哀江梅靈氣在泉下復相知



哭馬承之

平生千里別書問亦常來隼拂秋雲擊鸞兼霏霧迴臯無  
高世藝安見出倫才有紙盈箱篋局封不忍開

司馬文正公集卷五十八終





司馬文正公集卷之五十九

臨汾後學劉組曾重鐫

銘

鐵界方銘

景祐四年作

質重精剛端平直方進退無私法度攸資燥濕不渝寒暑  
不殊立身踐道是則是倣

劍銘

并序

或曰古者君子居常佩劍以備不虞今也無之倉  
卒何恃焉應之曰君子恃道不恃劍道不在焉雖

劍不去體不能救其死故苟得其道則劍存可也  
亡可也作劍銘云

昆吾之精太阿之靈深虞過防却除不祥倏忽縱橫萬夫  
莫當用得其道利器可保道之不明器無足憑怙力棄常  
匹夫以亡敗德阻兵國家以傾逆不敵順暴不犯仁上以  
守國知以全身長鋏蕭蕭七星炤腰不離於道神鋒可銷

槃水銘

嘉祐七年二月一日作

槃水之盈止之則平平而後清清而後明勿使小歛小歛  
必傾傾不可收用毀其成嗚呼奉之可不兢兢



四言銘

熙寧三年五月  
二十一日作

聰明壯勇之謂才忠信孝友之謂行正直中和之謂德深  
遠高大之謂道

箴

勇箴

景祐四  
年作

何爲而正致誠而正何爲而勇蹈正則勇孟賁之材心動  
則回臨義不疑嗚呼勇哉

逸箴

百仞之木生本秋毫德隳於惰名立於勞宴安之娛窮乎

一晝德著名成億年不朽可貪非道可愛非時沒世無稱  
君子耻之昔在周公作爲無逸大聖猶然况非其匹

友箴

余何遊乎余將遊聖之門仁之里非聖不師非仁不友可  
乎未可不若遊衆人之場聞善而遷觀過而改

頌

顏樂亭頌

并序周翰孔子四十七世孫名  
宗翰邦直李清臣子瞻蘇軾也

孔子舊宅東北可百步有井魯人以爲昔顏氏之  
居也周翰思其人買其地構亭其上命曰顏樂邦



直爲之銘其言顏子之志盡矣無以加矣予瞻論  
韓子以在隱約而平寬爲哲人之細事以爲君子  
之於人必於其小焉觀之光謂韓子以三書抵宰  
相求官與于襄陽書謂先宰後進之士互爲前後  
以相推援如市賈然以求朝夕芻米僕賃之資又  
好悅人以銘誌而受其金觀其文知其志其汲汲  
於富貴戚戚於貧賤如此彼又烏知顏子之所爲  
哉夫歲寒然後知松柏之後彫士貧賤然後見其  
志此固哲人之所難故孔子稱之而韓子以爲細

事韓子能之乎光實何人敢評先賢之得失聊因  
子瞻之言申而盡之頌曰

貧而無怨難顏子在陋巷飲一瓢食一簞能固其守不戚  
而安此德之所以完

贊

河間獻王贊

慶曆五年作

周室衰道德壞五帝三王之文飄淪散失棄之不省重以  
暴秦害聖典疾格言燔詩書屠術士稱禮樂者謂之狂惑  
迷仁義者謂之妖妄必薙滅先聖之道響絕迹盡然後慊



其志雖有好古君子心誦腹藏壁局巖鏞濟秦之險以通  
於漢者萬無一二漢初挾書之律尙存久雖除之亦未尊  
錄謂之餘事而已則我先王之道燄燄其不熄者無幾矣  
河間獻王生爲帝子幼爲人君是時列國諸侯苟不以宮  
室相高狗馬相尙則哀奸聚猾僭逆妄圖唯獻王厲節治  
身愛古博雅專以聖人法度遺落爲憂聚殘補缺校實取  
正得周官左氏春秋毛氏詩而立之周禮者周公之大典  
毛氏言詩最密左氏與春秋爲表裏三者不出六藝不明  
噫微獻王則六藝其遂瞠乎故其功烈至今賴之且夫觀

其人之所好足以知其心王侯貴人不好奢靡而喜書者  
固鮮矣不喜浮辯之書而樂正道知之明而信之篤守之  
純而行之勤者百無一二焉武帝雖好儒好其名而不知  
其實慕其華而廢其質是以好儒愈於文景而德業後之  
景帝之子十有四人栗太子廢而獻王最長嚮若遵大義  
屬重器用其德施其志必無神仙祠祀之煩宮室遊觀之  
費窮兵黷武之勞賦役轉輸之敝宜其仁豐義洽風移俗  
變煥然帝王之治復還其賢於文景遠矣嗟夫天實不欲  
禮樂復興耶抑四海自不幸而已矣



司馬文正公集卷五十九終

司馬文正公集

卷五十九贊





司馬文正公集卷之六十

臨汾後學劉組曾重鐫

論一

功名論

嘉祐二年作

自古人臣有功者誰哉愚以爲人臣未嘗有功其有功者皆君之功也何以言之夫地有草木天不雨露之則不能以生月有光華日不照望之則不能以明臣有事業君不信任之則不能以成此自然之道也古者大國不過百里小國半之然皆有賢卿大夫以輔佐其君大者以王小者

以霸下者猶能保其社稷世數十傳而不絕繇是觀之天下烏有無士之國哉患在人主知之不明用之不固信之不專耳如是則人臣雖有才智而不得施雖有忠信而不敢效人主徒憂勞於上欲治而愈亂欲安而愈危欲榮而愈辱矣然則人主有賢不能知與無賢同知而不能用與不知同用而不能信與不用同不用賢而求功業之美名譽之白難矣昔百里奚虞人也由余戎人也商鞅魏人也而用於秦苗賁皇申公巫臣楚人也而用於晉伍員楚人也而用於吳韓信陳平項羽之人也而用於漢是五國者



非無賢人也主不能知而驅之以資敵國此所謂有賢不能知與無賢同也齊桓公見郭氏之墟問於野人曰郭何故亡對曰以其善善而惡惡公曰善善而惡惡國所以興也而亡何故對曰善善而不能行惡惡而不能去所以亡也公歸以告管仲管仲曰君與其人俱來乎曰否管仲曰君亦一郭氏也公乃召而官之齊景公待孔子曰若季氏則吾不能以季孟之間待之齊王欲中國而授孟子室養弟子以祿萬鍾使諸大夫國人皆有所矜式是二君者非不知孔孟之爲聖賢也不能行其道而徒欲尊之以爲名

是以孔孟以爲不義而不留也洪範曰凡厥正人旣富方穀汝弗能便有好于而家時人斯其辜此所謂知賢不能用與不知同也樂毅爲燕伐齊下七十餘城燕王疑之使騎劫代將田單詐騎劫而敗之盡失齊地廉頗爲趙將拒秦久而不戰趙王疑之使趙括代將白起擊趙括而虜之坑其卒四十萬項羽用范增謀彊霸諸侯圍漢王滎陽幾拔矣聞漢之反間而疑之范增怒而去項羽卒爲漢擒夫駕車者旣服騏驎矣又以駑馬參之欲其並驅而前不可得也執田者旣樹嘉穀矣又以稂莠雜之欲其並生而茂



不可得也爲國者旣置賢才矣又以小人間之欲其並立而治不可得也是故宓子賤爲單父宰辭於君請君之近史二人與之俱至官使二史書方書輒掣其肘書不善則從而怒之二史患之辭請歸以告魯君魯君以問孔子孔子曰宓不齊君子也其才任王霸之佐屈節治單父將以自試也意者以此爲諫乎公寤太息而嘆曰此寡人之不肖寡人亂宓子之政而責其善者數矣微二史寡人無以知其過微夫子寡人無以自寤遽發所愛之使告宓子曰自今以往單父非吾有也從子之制有便於民者子決爲

之五年一言其要宓子遂得行其政而單父大治大禹謨  
曰任賢勿貳去邪勿疑疑謀勿成百志惟熙荀子曰人主  
有六患使賢者爲之則與不肖規之使智者慮之則與愚  
者論之使修士行之則與污邪之人疑之雖欲成立得乎  
哉譬之是猶立直木而恐其影之枉也惑莫大焉語曰好  
女之色惡者之孽也公正之士衆人之瘞也修乎道之人  
污邪之賊也今使污邪之人論其怨賊而求其無偏得乎  
哉譬之是猶立枉木而求其影之直也亂莫大焉噫人主  
苟不知其賢則已矣已審知其賢授之以政而復疑之何



哉凡忠直之臣行其道於國家則必與夫天下之姦邪爲  
怨敵矣非喜與之爲怨也不與之爲怨則君不尊國不治  
功不立也以一人之身日與天下之姦邪爲怨更進迭毀  
於君前而君不能決兼聽而兩可之如是則忠直之臣求  
欲無危不可得也君子非愛死而不爲也知其身死而功  
不立姦邪愈熾忠良愈恐政治愈亂國家愈危也是以君  
子難進易退辭貴就賤被髮佯狂逃匿山林者以此故也  
此所謂用賢不能專與不用同也明主爲之不然審求天  
下之大賢而亟用之專信之舉社稷百姓而委屬之雖有

至親不能奪也雖有至貴不敢爭也雖有讒巧不能間也  
確然若膠漆之相合視其際而不可得見也然後賢者得  
竭其心而施其才不憂怨賊之口不懼猜嫌之迹人主端  
拱無爲享其功利收其榮名而已矣古之聖帝明王用此  
道而光宅四海長育萬物功如天地名若日月者多矣固  
不待稱引而知也請言其時近而道卑者昔齊桓公得管  
仲三薰而三浴之解其繆紲置以爲相鮑叔桓公之傳也  
避太宰之位而安隨其後國子高子天子之守卿也人率  
五卿而聽其政令況其餘四境之內上下之人其孰敢不



戰戰慄慄從桓公而貴信之是以能九合諸侯一匡天下  
爲五霸首也陳平楚之亡將也漢高祖得之使典護諸將  
絳灌之屬盡害之高祖以平爲護軍中尉盡監護諸將諸  
將乃不敢言韓信亡卒也高祖用蕭何一言拔諸行伍之  
中以爲大將諸將皆驚而不敢爭也是以五年之中滅項  
羽定天下創業垂統四百歲而不絕蜀先主與關羽張飛  
布衣之友周旋艱險恩若兄弟一旦得諸葛孔明待之過  
於關張關張不悅先主曰孤之有孔明猶魚之有水願諸  
君勿復言是以能起於敗亡之中保有一方與魏吳爲敵

國苻永固得王景畧於處士以爲丞相貴戚大臣有害之者永固輒殺之謂太子宏及長樂公丕曰汝事王公如事我也是以能東取燕西取涼南取襄陽北取拓跋奄有中  
原幾乎海內此五臣者從今日視之皆英傑之才也曰曷使四君知之不明用之不固信之不專則管仲醢於齊庭  
陳平窮於戶牖韓信餓於淮陰諸葛孔明老於隆中王景畧死於華山名氏埋滅不可復知烏有曄曄功烈施於後  
世如此哉是以大雅云徐方旣同天子之功晉平公問叔向曰齊桓公之霸君之力乎臣之力乎叔向曰管仲善制



割隰朋善削縫賓胥無善純緣桓公知衣而已亦其臣之力也師曠曰管仲善斷割之隰朋善煎熬之賓胥無善齊和之羹已熟矣奉而進之而君不食誰能強之亦其君之力也魏文侯使樂羊將而攻中山三年而拔之返而論功文侯示之謗書一篋樂羊再拜稽首曰此非臣之功主君之力也繇是言之人臣不能立功凡有功者皆其君之功也

機權論

慶曆五年作

世之命機權也妄故作機權論以辨之機者弩之所以發

矢者也機正於此而的中於彼差之至微失之甚遠故聖人之用機也似之易曰機者動之微吉凶之先見者也又

曰君子見機

幾易本作

而作不俟終日然則機者事之未著

萌芽端兆之時聖人眇然見之能去禍而取福迎吉而禦凶所以爲神也聖人之所慎無過機者故曰兢兢業業一日二日萬機也權者銓也所以平輕重者也聖人之用權也必將校輕重商緩急彼重而此輕則捨此而取彼彼緩而此急則去彼而就此取捨去就之間不離於道乃所謂權也然則機者仁之端也權者義之平也今世俗之爲說



者乃欲棄仁義而行機權不亦反哉夫不知機權則無以爲聖人聖人未嘗斯須不用者機權而已矣聖人精心審謹而後行之故百姓萬物皆賴焉小人不知機權之道而誣竊其名妄行諄理所以福祿不久而禍亂及之也請問聖人機權之道曰昔紂爲玉杯象箸而箕子佯狂衛靈公仰視飛鴻而孔子行是皆知機者也夫杯箸小器飾以珠玉未爲太過而箕子知其必亡國者爲其奢淫泰侈之漸繇此始也仰視蜚鴻失理之細者而孔子去之者知其不能用聖人而有厭怠之心不去則大禍將至也如此聖人

之知機豈不偉哉伊尹放太甲微子去商歸周周公誅管  
蔡是皆知權者也夫數君子豈不知放君畔宗戮親之爲  
不善哉誠以放君之責輕而淪喪大業之禍重畔宗之譏  
薄而保存宗祀之孝深戮親之嫌小而傾覆周室之害大  
故去彼而取此也夫太甲之初欲敗度縱敗禮苟非苦其  
身體勞其思慮則不能變惡遷善克終允德成湯之業將  
墜於地伊尹躬受湯命阿衡王家故不得不放諸桐宮也  
受爲不道自絕於天微子不去與之偕亡則祖禰不祀宗  
族無主故不得不抱祭器而歸周也管蔡奉廢姓伐宗國



違天命逆人心傾危聖輔斲喪周室成王幼弱周公攝政  
故不得不奮干戈揚斧鉞以治之蓋周公非自愛而愛周  
室故也嚮若太甲尚可諫而改則伊尹必不放君商受苟  
可輔而存則微子必不畔宗管蔡猶可教而治則周公必  
不戮親夫豈不思誠不得已也是以太甲曰惟嗣王不惠  
于阿衡伊尹作書曰祗爾厥辟辟不辟忝厥祖是猶以辱  
先爲戒未欲正言覆亡之禍委蛇其辭以感動之也王惟  
庸罔念聞伊尹乃言曰無越厥命以自覆是正言禍敗以  
聳動之也王未克變伊尹乃以王生而榮逸不知勞辱狎

近小人積習至此非其性惡故曰茲乃不義習與性成營  
于桐宮密邇先生其訓無俾世迷言積習寢久將成其性  
及今猶可沮詘而改此乃伊尹盡心盡力於成湯太甲之  
至也微子之誥曰商其弗或亂正四方言受不可復正決  
必亡國也所以當出奔存湯後也父師若曰商其淪喪我  
罔爲臣僕言商旣亡宗族俱滅無所寄託也又曰王子弗  
出我乃顛隲言不可不行也此微子廣咨權謀輕重之審  
諦也大誥曰肆予冲人不叩自恤義爾邦君越爾多士尹  
氏御事言今東征非爲已也豳風曰旣取我子無毀我室



子以喻管蔡也室以喻周家也言管蔡輕而周家重也予  
羽譙譙予尾脩脩言勤瘁也予室翹翹風雨所漂搖予唯  
音嘒嘒言三監背誕王室音言危也危故我恐懼以憂之也  
此豈周公背公向私之志哉夫聖人之用權也如此故國  
家安而仁義立也後世之人昧錙銖之利以放逐其君懷  
芥蒂之嫌以屠滅其親而亦自比於伊周曰吾用機權不  
亦誣哉此乃亂臣賊子所以滋多也

朋黨論

嘉祐三年五月  
二十三日作

黃介夫作壞唐論五篇以爲壞唐者非巢溫與閹豎乃李

司馬文正公集

卷六十一

論

九

宗閔李德裕朋黨之弊也是誠得其本矣雖然介夫知其  
一未知其二彼盜賊之興繇閹豎閹豎之橫繇輔相是則  
然矣噫輔相樹立私黨更相排壓而不能正又誰咎哉夫  
朋黨之患不專在唐自古有之以堯之明共工驩兜相薦  
於朝舜臣堯旣流共工又放驩兜除其邪黨然後四門穆  
穆百工咸熙仲虺數夏之惡曰簡賢附勢實繁有徒武王  
數商之惡曰朋家作仇脅權相滅是則治亂之世未嘗無  
朋黨堯舜聰明故能別白善惡而德業昌明桀紂昏亂故  
不能區處是非而邦家覆亡繇是言之興亡不在朋黨而



在昏明矣洪範皇極曰無偏無詖遵王之義無有作好遵  
王之道無有作惡遵王之路無偏無黨王道蕩蕩無黨無  
偏王道平平無反無側王道正直周公戒成王曰孺子其  
朋孺子其朋其往無若火始燄燄厥攸灼敘弗其絕是以  
舜誅禹父而禹爲舜佐伊尹放太甲而相之周公放蔡叔  
而封蔡仲公之至也夫宗閔德裕雖爲朋黨繇文宗實使  
之文宗嘗曰去河北賊易去朝中朋黨難殊不知羣臣爲  
朋黨誰之過也繇是觀之壞唐者文宗之不明宗閔德裕  
不足專罪也

中和論

元豐七年十月三日作

君子從學貴於博求道貴於要道之要在治方寸之地而大禹謨曰人心惟危道心惟微惟精惟一允執厥中危則難安微則難明精之所以明其微也一之所以安其危也要在執中而已中庸曰喜怒哀樂之未發謂之中發而皆中節謂之和君子之心於喜怒哀樂之未發未始不存乎中故謂之中庸庸常也以中爲常也及其既發必制之以中則無不中節中節則和矣是中和一物也養之爲中發之爲和故曰中者天下之大本也和者天下之達道也智



者知此者也仁者守此者也禮者履此者也樂者樂此者也政者正其不然者也刑者威其不從者也合而言之謂之道道者聖賢之所共繇也豈惟人哉天地之所以生成萬物靡不由之故曰致中和天地位焉萬物育焉孔子曰君子無終食之間違仁造次必於是顛沛必於是故曰道不可須臾離可離非道也孔子曰中庸之爲德也其至矣乎民鮮久矣又曰回也其心三月不違仁其餘則日月至焉而已日月至焉者斯已賢矣以是觀之能久於中庸者蓋鮮矣孔子曰智者樂仁者壽蓋言知夫中和者無入而

不自得能無樂乎守夫中和者清明在躬志氣如神能無  
壽乎小雅曰樂只君子邦家之基樂只君子萬壽無期又  
曰樂只君子邦家之光樂只君子萬壽無疆蓋言君子有  
中和之德則邦家安榮旣樂且壽也孔子曰克己復禮爲  
仁蓋言禮者中和之法仁者中和之行故得禮斯得仁矣  
孔子閒居曰無聲之樂志氣不違以至於氣志旣起樂記  
曰易直子諒之心生則樂以至於不言而信不怒而威蓋  
言樂以中和爲本以鐘鼓爲末也商頌曰不競不綈不剛  
不柔敷政優優百祿是遒蓋言政以中和爲美也大雅曰



惠此中國以綏四方無縱詭隨以謹無良蓋言刑以中和爲貴也子曰飯蔬食飲水曲肱而枕之樂亦在其中矣又曰回也一簞食一瓢飲不改其樂揚子曰紓朱懷金之樂也外顏氏子之樂也內蓋言聖賢內守中和雖幽隱貧賤不失其樂也劉康公曰民受天地之中以生所謂命也能者養之以福不能者敗以取禍中庸曰大德者必得其壽蓋言君子動以中和爲節至於飲食起居咸得其宜則陰陽不能病天地不能夭雖不導引服餌不失其壽也孟子曰我善養吾浩然之氣夫志氣之帥也氣體之充也志至

焉氣次焉故孟子養德以氣言之蓋能謹守中和之志不以喜怒哀樂亂其氣則志平氣順德日新矣故曰持其志無暴其氣及夫德之成也沛然不息確然不動挺然不屈故曰其爲氣也至大至剛以直養而無害不有道義以充其內能如此乎故曰配義與道無是餒也凡人爲不善能欺天下之人不能欺其心雖忍而行之於其心不能無蒂芥焉然則浩然之氣不存矣故曰行有不慊於心則餒矣君子優游從容以養其氣雖不敢忽忘亦不正以爲事欲其速成故曰必有事焉而勿正心勿忘勿助長也操之則



存捨之則亡久而無怠然後自得之此其所以難言也楊子曰藏心于淵美厥靈根君子存神於內應務於外雖往來萬變未嘗失其所守是以百骸治而德本植焉故曰神不外也志之所至氣必輔之君子乘之以爲善小人乘之以爲惡故曰氣者所適善惡之馬也君子守中和之心養中和之氣既得其樂又得其壽夫復何求哉孔子曰狂者進取又曰吾黨之小子狂簡斐然成章如光之謂矣雖然此皆纂述聖賢之言非取諸胸臆也夫道猶的也射者莫不志於的其中否則未可知也必俟有道者乃能裁之

言思文正公集  
卷之一  
才德論

慶曆五年作

世之所謂賢者何哉非才與德之謂邪二者殊異不可不察所謂才者存諸天德者存諸人智愚勇怯才也愚不可強智怯不可強勇四者有常分而不可移故曰存諸天善惡逆順德也人苟棄惡而取善變逆而就順孰禦之哉故曰存諸人譬之於物金可以爲鐘可以爲鼎玉可以爲珪可以爲璧此存諸人者也玉不可以爲鐘鼎金不可以爲珪璧此存諸天者也存諸天者聖人因而用之存諸人者聖人教而成之雖然自非上聖必有偏也厚於才者或薄



於德豐於德者或殺於才鈞之不能兩全寧捨才而取德  
昔者鄆舒有三雋才恃之而不務德晉滅之智宣子將以  
瑤爲後智果曰不如宵也瑤之賢於人者五其不逮者一  
也美鬚長大則賢射御足力則賢伎藝畢給則賢巧文辯  
慧則賢疆毅果敢則賢如是而甚不仁以其五賢陵人而  
以不仁行之智宗必滅宣子弗聽智氏果亡故曰寧捨才  
而取德抑又聞之爲國家者進取莫若才守成莫若德進  
取不以才則無功守成不以德則不久陳平貪污之人也  
韓信無耻之士也樊噲屠者而酈食其酒徒也天下之至

賤無行者也然其才皆有過人者漢祖舉而用之故蹶秦  
仆項而卒兼天下也魏國置相而用田文吳起不悅與之  
論功田文曰我戰鬪治民皆不如子若主幼國危大臣未  
附百姓不信當是時屬之子乎屬之我乎吳起乃謝曰屬  
之子矣此言田文無佗技能唯忠厚可信也夫有德者必  
不反其君故可以託六尺之孤寄百里之命爲社稷臣有  
才者不必忠信故以羈策御之而爲德者役也然則德者  
掌也才者指也掌亡則指不可用矣是故民者田也國者  
苗也才耒耜也德膏澤也進取不以才猶無耒耜而耕也



雖勤灌溉不能生矣守成不以德猶既種而無膏澤也苗  
稿無日矣故人主利其耒耜以墾治其民而封殖其國又  
引膏澤以溉之使其本根深固而枝葉蓂茂故子孫謹守  
其畔穫而食之而已復何爲哉

司馬文正公集卷六十終

司馬文正公集

卷六十 論

一

七





司馬文正公集卷之六十一

臨汾後學劉組曾重鐫

論

知人論

嘉祐二年作

考制度習威儀辨牢餽之等詳籩豆之數此宗人之職也  
察清濁別正邪協律呂之音肄綴兆之容此太師之職也  
練士卒簡器械戰必勝攻必取此將帥之職也明法令審  
獄訟禁彊禦誅姦回此士師之職也豐衣食衍貨財通有  
無紓滯積此司會之職也便舟輿利器械守法度禁淫巧

此工師之職也考龜筮占祲祥相吉凶視休咎此太卜之職也謹蓋藏吝出納治文書精會計此府史之職也若夫選賢而進之量能而任之成功者賞敗官者誅此則人君之職也夫天下至廣也兆民至衆也萬幾至繁也而天子兼而有之必將以一人之耳目智力爲之則所及者寡所廢者多矣是以明主擇輔佐以論官師論官師以正羣吏正羣吏以和萬民則治約而事無曠矣益稷曰元首明哉股肱良哉庶事康哉此言君明則臣良矣良則事康也立政曰宅乃事宅乃牧宅乃準茲惟偉經本作后矣又曰文王惟



克厥宅心乃克立茲常事司牧人也

經本作以

克俊有德文王

罔攸兼于庶言庶獄庶慎惟有司之牧夫是訓用違庶獄  
庶慎文王罔敢知于茲此爲人君急於知人緩於知事也  
魏文侯與田子方飲文侯曰鍾聲不比乎左高田子方笑  
文侯曰何笑子方曰臣聞之君明樂官不明樂音今君審  
於音臣恐其聾於官也是以笑荀子曰治國有道人主有  
職若夫貫日而治詳一日而曲列之是所以使夫百吏官  
人爲也不足以是傷遊玩安燕之樂若夫論一相以兼率  
之使臣下百吏莫不宿道鄉方而務是夫人主之識也人

主者守至約而詳事至佚而功垂衣裳不下簞席之上而海內之民莫不願得以爲帝王夫是之謂至約樂莫大焉人主者以官人爲能者也匹夫者以自能爲能者也人主得使人爲之匹夫則無所移之百畝一守事業窮無所移之也今以一人兼聽天下日有餘而治不足者使人爲之也大有天下小有一國必自爲之然後可則勞苦耗悴莫甚焉如是則雖臧獲不肯與天子易勢業以是統天下一四海何故必自爲之自爲之者役夫之道也墨子之說也論德使能而官施之者聖王之道也儒之所謹守也傳曰



農分田而耕賈分貨而販百工分事而勸士大夫分職而聽建國諸侯之君分土而守三公總方而議則天子恭已而已矣繇是言之人君之事首莫大於知人也昔者舜導百川不如禹殖百穀不如稷布五教不如契聽五刑不如皋陶典百工不如垂典山澤不如益典禮不如伯夷典樂不如夔然而明此八者之本能知其人而任使之者舜也譬如車之有轂宮之有棟人之有心此羣聖所以爲之役而歸之功也嗚呼帝王之事美矣大矣固不可得而言也齊桓公兄弟爭國暴於豺狼閭門不治甚於狗彘然獨能

知管仲之賢舉國而委之一則仲父二則仲父是以兵車之會三乘車之會六指麾左右而諸侯莫敢不從後世言桓公者徒知其賢而不復知其惡也孔子言衛靈公之無道季康子曰夫如是奚而不喪子曰仲叔圉治賓客祝鮀治宗廟王孫賈治軍旅夫如是奚其喪齊文宣帝荒淫狂悖甚於桀紂然而知楊愔之賢悉以國事委之時人以爲主昏於上政清於下凡此皆淫昏暴亂之君也徒以能知賢人而用之大者以霸其次以安小者以存況乎以聖君而用賢臣是猶王良之御六驥逢蒙之關繁弱孟賁之揮



干將何適而不達何射而不中何擊而不斷哉或曰人主之職在知人則既知之矣抑以堯之聖而失之四凶孔子之聖而失之宰我子羽夫人豈易知也哉曰是則然矣夫射者必志於的弓矢既調專精審固而發之雖或不中亦鮮矣與夫冥冥而射者不猶愈乎昔臯陶陳九德曰寬而栗柔而立愿而恭敬而肅擾而毅直而溫簡而廉剛而塞疆而義彰厥有常吉哉曰宣三德夙夜浚明有家曰嚴祗敬六德亮采有邦翕受敷施九德咸事俊乂在官百僚師師百工惟時孔子曰視其所以觀其所由察其所安人焉

庾哉人焉庾哉李克曰居視其所親富視其所與達視其所舉窮視其所不爲貧視其所不取是亦知人之術也顧人主不深察而已矣

### 三勤論

楊子曰民有三勤政善而吏惡一勤也吏善而政惡二勤也政吏駢惡三勤也愚謂勤民者一未嘗有三也何則吏者民之司命吏良則民斯逸矣未有吏善而政惡者也亦未有政善而吏惡者也度吏之才而任之者君之政也形也民之力而用之者吏之政也吏苟得人安有穀人不足

體也



於晝絲人不足於夜者乎故爲人君者謹於擇吏而已矣  
佗奚足事哉

十哲論

慶歷二年作

十哲於經無見而學者多稱之國家祀孔子十哲則祀於  
堂上其餘門人祀於東西廡下俎豆之數皆異焉愚竊以  
爲過矣是十人者孔子雖以四科第之非謂門人之中唯  
十人爲賢也至於柴也愚參也魯師也辟由也喭豈謂唯  
此四人爲不肖邪以此觀之尊十哲非孔子意明矣必若  
以一善取之則門人之賢者非止十人也以盡善取之則

德行之外未有無過者也孔子謂宰我曰朽木不可彫於  
予與何誅謂子貢曰賜不受命而貨殖焉億則屢中謂冉  
有曰求也非吾徒也小子鳴鼓而攻之可也謂子路曰由  
知德者鮮矣謂子夏曰商也不及然則豈爲盡善邪又十  
哲之外孔子之所稱譽多矣曾點與子路冉有俱侍坐各  
言其志而孔子獨曰吾與點也曾參以至孝顯孔子爲之  
語孝經又謂子賤君子哉若人然則十人之餘豈可盡誣  
邪且政事言語文學之高者不足以當德行之卑者是十  
人者其中固有差等矣豈可爲之一槩耶



四豪論

慶歷二年作

戰國之時天下禮義消亡下陵上替諸侯僭天子大夫僭諸侯陪臣之間有能約身抑志尊賢養士不愛貨以樹聲名者齊有孟嘗魏有信陵趙有平原楚有春申雖不能以禮義佐其君以政教和其民合於至公槩於大道然自奮於濁世天下談士異口同舌咸謂之賢銓於四人臧否優劣亦可聞歟論者曰凡人臣者上以事君中以利國下以養民釋此三者非人臣也臣而不臣聖王當世必爲誅首孟嘗君養無賴匿亡命廢公法樹私恩嬭采名譽以竊國

相之任迹其行事皆爲身耳非能爲國與民謀也至其晚節遂挾仇敵以覆宗國保薛中立自比諸侯臣而不臣孰甚於此春申君進書春宮解楚國社稷之憂縱楚太子而自以身當不測之誅智勇忠信有足稱者至其柱石楚國權寵無貳割江東之封窮僭奢之樂十餘年間楚國益弱又納邪人之言造姦僞之謀亂其國嗣洿敗王家方諸田文罪又甚焉終爲李園所襲身首屠裂則其智勇忠信果安在也平原君行事大倣孟嘗至於貪上黨之田致邯鄲之禍遂至國家大敗社稷幾亡于以知其智謀尤出數子



之下也然趙奢戮平原君之客奢諭釋以公義而平原君  
薦奢於朝卒著功名且平原君臣人之節終始無虧此其  
賢於孟嘗春申遠矣信陵君以母弟之親卿相之尊抱關  
鼓刀之人親執馭而事之詘而不耻勞而不倦非有高世  
之材孰能如此且向使侯生朱亥皆實庸人公子雖事之  
如是不足稱也然公子所以降身訓志者審知二子之賢  
耳以區區之魏惴懼之衆當秦乘勝十倍之兵一戰却之  
邯鄲全六國安信陵君之功也秦乘公子之去魏急攻大  
梁公子一悟毛薛之言翻然易慮歸救宗國復破秦軍閉

諸函谷可謂能矣魏王信讒猜阻公子公子遂滅迹酣飲  
全身遠害以其壽終可謂智矣智能如此而又守之以仁  
行之以恭必若采善於亂世論賢於俠游則彼三人者蔑  
以加其上矣故校其臧否當以信陵爲首平原次之孟嘗  
又次之春申爲其下矣或曰無忌盜國兵符矯殺晉鄙以  
赴平原君之私交雖有功於魏非忠臣也何以賢於三子  
對曰趙魏唇齒之國以虎狼之秦攻危亡之趙趙亡則魏  
斃理勢然矣魏王不達事宜徒畏強秦之空言坐擁盛兵  
以觀成敗計之大失無過於此故無忌矯奪其軍以救趙



非獨赴趙之難亦爲魏謀也奚其不忠哉漢高祖過大梁輒祠信陵君爲置守冢者彼三子則皆無旌異高祖英主也蓋有以知之矣

管仲論

孔子稱管仲之器小哉先儒以爲管仲得君如此不勉之以王而僅止於霸此其所以爲小也愚以爲周天子存而管仲勉齊桓公以王是教之篡也此管仲所耻而不爲孔子顧欲其爲之邪夫大人者顧時不用則已用則必以禮樂正天下使綱紀文章粲然有萬世之安豈直一時之功

司馬文正公集 卷六十一  
名而已邪管仲相桓公霸諸侯禹迹所及冠帶所加未能  
使之皆率職也而偃然自以天下爲莫已若也朱絃而鏤  
簋反玷而三歸此其器豈不小哉楊子曰大器其猶規矩  
準繩乎先自治而後治人斯言得之矣

### 荀息論

晉獻公使荀息傅奚齊荀息曰臣竭其股肱之力不濟則  
以死繼之及里克殺奚齊荀息死之君子曰詩所謂白圭  
之玷尚可磨也斯言之玷不可爲也荀息有焉杜元凱以  
爲荀息有此詩人重言之義以愚觀之元凱失左氏之意



多矣彼生與君言死而背之者是小人穿窬之行君子所  
不譏也夫立嫡以長正也獻公溺於嬖寵廢長立少荀息  
爲國正卿君所倚信不能明白禮義以格君心之非而遽  
以死許之是則荀息之言玷於獻公未沒之前而不可救  
於已沒之後也然則左氏之志所以貶荀息而非所以爲  
褒也

廉頗論

慶歷五  
年作

世稱藺相如以區區之趙抗虎狼之秦秦雖彊暴不能陵  
趙者相如之功也謂其賢於廉頗愚竊疑之何則秦之所

以不能陵趙者以其國治兵彊也固非口舌之間所能抗也然則國何以治兵何以彊豈非廉頗在其位邪趙得和氏璧秦王聞而欲之請易之以土田相如奉璧銜命而往秦王欲彊取之相如抗節不撓視死如歸卒欺秦王而歸璧於趙以是爲相如之功噫又何足稱哉夫和氏之璧懷握之玩得之不足以爲重失之不足以爲輕而相如以死爭之以詐取之有如秦王赫然增怒肆其彊暴逞其毒螫菹醢相如移兵攻趙是爲趙王愛數寸之玉喪國士之賢貪無用之器貽宗廟之憂人臣愛君果如是哉澠水之會



秦王請趙王鼓瑟而詔史書之相如進缶於秦王秦王不可則挺劍劫之必得當而後止是何異賈豎小人矜豪恃氣不能相下者惡足言功哉昔桀爲無道湯幽囚於夏臺戎狄侵幽太王避之於岐文王三分天下有其二就拘於羑里夫以幽拘之辱棄國而逃與一鼓瑟之間孰難哉然而三王忍耻行之卒蹶夏商撫綏四海相如儻能相趙王示微弱以驕秦忍小耻以怒趙崇德修政以須秦之可亡從而伐之濟黔首於塗炭救赤子於虎狼其功烈豈不燁煌光遠哉而於罇俎之間壇坫之上爭言暴氣取當而止

英偉之士不亦可羞哉趙王不能遠觀嘉其一命之不辱  
賞其要劫之小策一旦位諸功實之上廉頗日夜憤憤欲  
礪刃刺之而相如能不與之校此則賢矣然亦不可用一  
善掩大功世稱藺優於廉非通論也

賈生論

慶歷三  
年作

世皆以賈生聰明辯博曉練治體若遭明主當治世誠得  
盡用其道三代可復帝皇可幾不幸黜於絳灌疎廢早終  
可爲痛惜愚以爲賈生學不純正雖有雋才任之爲治必  
不效矣何以知之觀其書而知之賈生數上疏陳得失云



可爲痛哭者一流涕者二太息者六然所謂痛哭者謂侯  
太彊也以爲指大於股脛大於腰久而不制必爲國害夫  
爲天下者患政刑之不立不患諸侯之太彊賈生言不見  
用然終文帝世諸侯帖服孝景初立晁錯不勝其憤而削  
之反者紛然響應起不踰時敗亡不救惡能爲漢之大害  
哉所謂流涕者匈奴不賓也匈奴荒外之國與禽獸無殊  
天下治而不服不足損聖王之德天下弊而得之不足爲  
聖王之功而賈生孜孜愛其蕞爾之金絮忘其征討之大  
費忿其區區之禮節忽其勤民之鉅害惡在其爲知治體

也夫治天下之具孰先於禮義安天下之本孰先於嗣君  
禮義不張雖復四夷賓服疆場不聳當如內憂何儲嗣失  
教雖復諸侯微弱四方無虞其誰能守之然賈生以此二  
者列之於後以爲餘事捨國家之紀綱遺天下之大本顧  
切切然以列國外夷爲慮皆涕泣之可謂悖本末之統謬  
緩急之序謂之知治體何哉又曰仁義者人主之芒刃也  
法制者人主之斤斧也不能以道輔人主鎮撫諸侯綏之  
以德齊之以禮而欲疎骨肉斷慈惠視仁義爲虛器操刑  
法爲利柄翦周孔之夷塗樹申商之險術繇此觀之所學



豈得爲純正耶世人不察其所繇之術苟見其材之茂學之博其言曄曄可觀而不得施於世因從而歎之不知夫駁濫刻深非吾黨也夫唯材高而道不正者君子惡之

龔君賓論

慶歷五年作

王莽慕龔君賓之名誅

音戌誘也

以尊爵厚祿劫以淫威重勢

而必致之君賓不勝逼迫絕食而死班固以薰膏之語譏焉未聞有爲辨之者也可不大哀昔者紂爲不道毒痛四海武王不忍天下困窮而征之斯則有道天子誅一亂政之匹夫爾於何不可而伯夷叔齊深非之義不食周粟而

餓死狷隘如此仲尼猶稱之曰仁以爲不殞其節而已況  
於王莽憑漢累世之恩因其繼嗣衰絕飾詐僞而盜之又  
欲誣洿清士以其臭腐之爵祿甘言諛禮期於必致不可  
以智免不可以義攘則志行之士舍死何以全其道哉或  
者謂其不能黜芳棄名保其天年然則虎豹之鞞何以異  
於犬羊之鞞庸人之行孰不如此又責其不詭辭曲對若  
薛方然然則將未免於諂豈曰能賢故君賓遭遇無道及  
此窮矣失節之徒排毀忠正以遂己非不察者又從而和  
之太史公稱伯夷叔齊不有孔子則西山之餓夫誰識知



之信矣哉

邴吉論

邴吉爲丞相出逢羣盜格鬪死傷橫道過之不問見牛喘而問之以爲詰禁盜賊守令之事陰陽不調此乃宰相職耳談者美之愚竊以爲不然夫宰相所以治陰陽者豈拱手端署無所施設而陰陽自調蓋亦佐人主治庶政安四海使和氣洋洋薄於宇宙旁暢周達浸潤滲漉明則百姓洽幽則鬼神諧然後寒暑時至萬物阜安雖古昔聖人之治天下至於陰陽和寒暑時而至治極矣豈庸人所能致

哉當邴吉爲政之時政治之不得刑罰之失中不肖之未  
去忠賢之未進可勝紀哉釋此不慮而慮於牛喘以求陰  
陽不亦疎乎且京邑之內盜賊縱橫政之不行孰甚於此  
詩云商邑翼翼四方之極近不能正如遠人何若曰守令  
之職守令不賢當責何人非執政者之過而又誰歟昔士  
會爲政晉國之盜逃奔于秦子產爲政桃李垂於街者莫  
援若盜賊不禁而曰長安令之職風俗不和而曰三老之  
職刑罰不當而曰廷尉之職衣食不足而曰司農之職推  
而演之天下之事各有其官則宰相居於其間悉無所與



而曰主調陰陽陰陽固可坐而調耶愚以爲邴吉自知居其位而無益於世飾智譎問以掩其迹抑亦自欺而已矣

致知在格物論

元豐六年作

人之情莫不好善而惡惡慕是而羞非然善且是者蓋寡惡且非者實多何哉皆物誘之也物迫之也桀紂亦知禹湯之爲聖也而所爲與之反者不能勝其欲心故也盜跖亦知顏閔之爲賢也而所爲與之反者不能勝其利心故也不軌之民非不知穿窬探囊之可羞也而冒行之驅於飢寒故也失節之臣亦非不知反君事讎之可愧也而忍

處之逼於刑禍故也況於學者豈不知仁義之美廉耻之  
尚哉斗升之秩錙銖之利誘於前則趨之如流水豈能安  
展禽之黜樂顏子之貧乎動色之怒毫末之害迫於後則  
畏之如烈火豈能守伯夷之餓狗比干之死乎如此則何  
暇仁義之思廉耻之顧哉不惟不思與不顧也抑亦莫之  
知也譬如逐獸者不見泰山彈雀者不覺露之霑衣也所  
以然者物蔽之也故水誠清矣泥沙汨之則俛而不見其  
影燭誠明矣舉掌翳之則咫尺不辨人眉目況富貴之汨  
其智貧賤之翳其心哉惟好學君子爲不然已之道誠善



也是也雖茹之以藜藿如梁肉臨之以鼎鑊如茵席誠惡也非也雖位之以公相如塗泥賂之以萬金如糞壤如此則視天下之事善惡是非如數一二如辨黑白如日之出無所不照如風之入無所不通洞然四達安有不知者哉所以然者物莫之蔽故也於是依仁以爲宅遵義以爲路誠意以行之正心以處之修身以帥之則天下國家何爲而不治哉大學曰致知在格物格猶扞也禦也能扞禦外物然後能知至道矣鄭氏以格爲來或者猶未盡古人之意乎

言集卷六十一  
三  
葬論

元豐七年作

葬者藏也孝子不忍其親之暴露故斂而藏之齋送不必  
厚厚者有損無益古人論之詳矣今人葬不厚於古而拘  
於陰陽禁忌則甚焉古者雖卜宅卜日蓋先謀人事之便  
然後質諸蓍龜庶無後艱耳無常地與常日也今之葬書  
乃相山川岡畎之形勢考歲月日時之支干以爲子孫貴  
賤貧富壽夭賢愚皆繫焉非此地非此時不可葬也舉世  
惑而信之於是喪親者往往久而不葬問之曰歲月未利  
也又曰未有吉地也又曰遊宦遠方未得歸也又曰貧未



能辦塋具也至有終身累世而不塋遂棄失尸柩不知其  
處者嗚呼可不令人深歎愍哉人所貴於身後有子孫者  
爲能藏其形骸也其所爲乃如是曷若無子孫死於道路  
猶有仁者見而殮

音覲瘞  
尸曰殮

之邪先王制禮塋期遠不過七

月今世著令自王公以下皆三月而塋又禮未塋不變服  
食粥居倚廬哀親之未有所歸也旣塋然後漸有變除今  
之人背禮違法未塋而除喪從宦四方食稻衣錦飲酒作  
樂其心安乎人之貴賤貧富壽夭繫於天賢愚繫於人固  
無關預於塋就使皆如塋師之言爲人子者方當哀窮之

際何忍不顧其親之暴露乃欲自營福利邪昔者吾諸祖之塋也家甚貧不能具棺槨自太尉公而下始有棺槨然金銀珠玉之物未嘗以錙銖入於壙中將塋太尉公族人皆曰塋者家之大事奈何不詢陰陽此必不可吾兄伯康無如之何乃曰詢於陰陽則可矣安得良塋師而詢之族人曰近村有張生者良師也數縣皆用之兄乃召張生許以錢貳萬張生野夫也世爲塋師爲野人塋所得不過千錢聞之大喜兄曰汝能用吾言吾畀爾葬不用吾言將求佗師張師曰惟命是聽於是兄自以已意處歲月日時及



壙之淺深廣狹道路所從出皆取便於事者使張生以墓書緣飾之曰大吉以示族人族人皆悅無違異者今吾兄年七十九以列卿致仕吾年六十六忝備侍從宗族之從仕者二十有三人視佗人之僅用墓書未必勝吾家也前年吾妻死棺成而歛裝辦而行壙成而墓未嘗以一言詢陰陽家迄今無佗故吾常疾陰陽家立邪說以惑衆爲世患於喪家尤甚頃爲諫官嘗奏乞禁天下墓書當時執政莫以爲意今著茲論庶俾後之子孫墓必以時欲知墓具之不必厚視吾祖欲知墓書之不足信視吾家

司馬文正公集卷六十一終



司馬文正公集卷之六十二

臨汾後學劉組曾重鐫

議

不以卑臨尊議

慶歷五年作

大傳以爲武王克商祀於牧室追王太王王季文王不以卑臨尊也夫父子之間譬猶天地之體殊君臣之位絕尊卑之分天性自然是以子雖爲天子無害父之尊父雖爲士子不敢先之人道之大倫古今之通義也武王纂紹前迹登隆基緒追尊先世告成王業蓋以推功歸美崇戴前

人非謂身臨四海之尊不可以諸侯爲祖父也竊謂記禮者深於聖人之旨失之何則太王王季文王追褒旣盛則太王之前公劉不窋之倫尚爲以卑臨尊未得謂之順也然則追稱繼號終已無窮豈可行哉謹案武成曰太王肇基王迹王季其勤王家我文考文王克成厥勲又周頌曰天作高山太王荒之大雅曰維此王季受祿無喪奄有四方至言文王受命非一不可悉著然則周之王迹肇於太王茂於王季成於文王終於武王武王旣有四海追思王迹之所繇興積功開業之艱難是故推三世而王之以明



非已功藉祖宗之餘烈也聖人之志昭晰若此而謂之不  
欲以卑臨尊其爲失也大矣且夫以太王之仁愛勤勞王  
季之孝友光明文王之布德行化討叛懷柔三分天下之  
諸侯而有其二謙畏天命不輯大勲以授聖子武王因累  
世之基用既王之周推已亡之商而取天位臨四海朝諸  
侯雖以中庸之君處之猶不敢蓋其祖宗之勲謂天祿繇  
已而成徒以私意追王祖宗不使諸侯臨天子之尊而已  
況於武王大聖豈得爾哉秦誓曰予克受非予武惟朕文  
考無罪受克予非朕文考有罪惟予小子無良夫武王歸

司馬文正公集 卷六十二  
美前人之意如此追王之理豈不明與

祔廟議

嘉祐八年六月一日上

禮天子七廟三昭三穆與太祖之廟而七太祖之廟萬世

不毀其餘昭穆盡則毀

舊本無  
親字

示有終也自漢以來天子

或起於布衣以受命之初太祖尚在三昭三穆之次故或  
祀四世或祀六世其太祖以上之主雖屬尊於太祖親盡  
則遷故漢元帝之世太上廟主瘞於寢園魏明帝之世處  
士廟主遷於園邑晉武帝祔廟遷征西府君惠帝祔廟又  
遷豫章府君自是以下大抵過六世則遷其神主蓋以太



祖未正東嚮之位故止祀三昭三穆若太祖已正東嚮之位則并三昭三穆爲七世矣唐高祖初立祀四世太宗增祀六世及太宗祔廟則遷洪農府君神主於夾室高宗祔廟又遷宣皇神主於夾室皆祀六世此前世之成法也惟明皇立九室祀八世事不經見難可依據今若以太祖太宗爲一世則大行皇帝祔廟之日僖祖親盡當遷於西夾室祀三昭三穆於先王典禮及近世之制無不符合太廟更不須添展一室

配天議

伏准中書劄子翰林學士王珪及知制誥錢公輔等奏季  
秋大饗明堂以仁宗皇帝配神作主事奉聖旨令臺諫及  
經筵臣寮與兩制禮院同共再詳定聞奏者朝廷以祖宗  
事重不敢自專博訪群臣使各陳其意臣等愚懵不達古  
今但據所聞正禮以對至於取捨繫自聖明竊以孝子之  
心誰不欲尊其父者聖人制禮以爲之極不敢踰也故祖  
已訓高宗曰祀無豐於昵孔子與孟懿子論孝亦曰祭之  
以禮然則事親者不以數祭爲孝貴於得禮而已矣祭法  
有虞氏禘黃帝而郊嚳祖顓頊而宗堯夏后氏禘黃帝而



郊鯀祖顓頊而宗禹商人禘嚳而郊冥祖契而宗湯周人  
禘嚳而郊稷祖文王而宗武王先儒謂禘郊祖宗皆祭祀  
以配食也禘謂祭昊天於圓丘也祭上帝於南郊曰郊祭  
五帝五神於明堂曰祖宗故詩曰思文后稷克配彼天又  
我將祀文王於明堂此其證也下此皆不見於經矣前漢  
以高祖配天後漢以光武配明堂以是觀之古之帝王自  
非建邦啟土及造有區夏者皆無配天之文故雖周之成  
康漢之文景明帝章帝其德業非不美也然而子孫不敢  
推以配天者避祖宗也孝經曰嚴父莫大於配天則周公

其人也孔子以周公有聖人之德成太平之業制禮作樂而文王適其父也故引之以證聖人之德莫大於孝答曾子之問而已非謂凡有天下者皆當尊其父以配天然後爲孝也近世祀明堂者皆以其父配五帝此乃誤識孝經之意而違先王之禮不可以爲法也景祐二年仁宗詔禮官稽案典籍辨崇配之序定二祧之位乃以太祖爲帝者之祖比周之后稷太宗真宗爲帝者之宗比周之文武然則祀真宗於明堂以配五帝亦未失古禮今仁宗雖豐功美德洽於四海而不在二祧之位議者乃欲捨真宗而以



仁宗配食明堂恐於祭法不合又以人情言之是絀祖而進父也夏父弗忌躋僖公先兄而後弟孔子猶以爲逆祀書於春秋况絀祖而進父乎必若此行之不獨乖違典禮恐亦非仁宗之意也議者又欲以太祖及三宗迭配郊邱及明堂臣等亦以爲不可何則國家受天永命傳祚萬世若繼體守文之君皆得配天則子孫將有無窮之數與祖宗無別也凡爲國家者制禮立法必思萬世之規不可專徇目前而已臣等竊謂宜遵舊禮以真宗配五帝於明堂行之爲便

宗室襲封議

時在學士院朝廷以爲非是兩制議者各贖銅三十斤禮院各追一官

臣等竊原聖人制禮之意必使嫡長世世承襲者所以重正統而絕爭端也古者諸侯生立世子死則襲爵故令文稱諸王公侯伯子男皆子孫承嫡者傳襲若無嫡子及有罪疾立嫡孫無嫡孫以次立嫡子同母弟無母弟立庶孫曾孫以下准此皆爲始薨之時應襲爵之人也其無後者則國除自唐末以來三公以下不復承襲國朝故事常封本宮最長者一人爲國公陛下以爲非古故於去年十二月十一日降勅節文稱宣祖太祖太宗之子皆擇其後一



人爲宗令世世封公補環衛之官以奉祭祀不以服屬盡  
故殺其恩禮又稱其非袒免親更不賜名授官太常禮院  
尋奏檢詳國朝近制諸王之後皆用本官最長一人封公  
繼襲今來新制旣言祖宗之子皆擇其後一人爲宗卽與  
自來事體不同本院參詳合依禮令傳嫡承襲閏十一月  
五日奉聖旨祖宗之子并濮國公並令傳嫡襲封所有見  
今諸官院已封公者令依舊將來卽更不襲封臣等詳觀  
兩次詔旨丁寧皆欲以復古禮而垂正統也今據禮院所  
定諸王後合襲封人內除越王曾孫世程魯王孫宗肅韓

王孫宗績吳王孫宗絳並依禮令當傳襲外其昭成太子  
陳王蔡王皆無後國當除宗保仲郃宗達以旁親繼襲乃  
是朝廷特恩爲之立後紹封其國於禮典亦無乖違所有  
秦王之後陳薦等欲立其庶曾孫克繼韓忠彥等欲立其  
庶長孫承亮楚王之後陳薦等欲立其庶曾孫世彥韓忠  
彥等欲立其庶長孫從式魏王之後衆禮官皆欲立其嫡  
孫同母弟宗惠臣等看詳三王見今自有正統而承亮從  
式宗惠皆係旁支若此三人襲三王之封則子子孫孫常  
居環衛世襲爵祿與國無窮其正統子孫袒免以外更不



賜名授官數世之後降在皂隸如此三人何幸而封正統何罪而絕不惟與禮令之意乖違亦非聖詔所謂爲宗傳嫡者也所以然者蓋緣禮令據初薨之時定爲嗣之人今日於數世之後議當爲後者事體有殊而專執令文所以參差不合而異論紛紜也臣等案忠彥等以爲令文之制與古稍異若無嫡孫而有嫡曾孫則捨曾孫而立嫡子母弟若無母弟又立庶子以此知亦許推及旁支常以親近者爲先也今令文稱無嫡孫同母弟則立庶孫以禮典與五服敕言之諸子之子除嫡長外皆爲庶孫旣立庶孫則

當於諸旁庶孫內擇其長者一人立之蓋王視庶孫恩親等也庶孫比曾孫行尊而屬近也臣等案令文皆約古禮爲之安有與古不同之禮借使不同朝廷方憲章稽古亦當捨令而從禮豈可棄禮而就令也況令文所謂子孫承嫡者傳襲言嫡子嫡孫相繼不絕雖經百世皆應傳襲也若不幸而絕則有立嫡子同母弟以下之事非謂有嫡曾孫捨之不立而立嫡子之母弟也晉庾純云古者所以重宗諸侯世爵士大夫世祿防其爭競故明其宗也吳商云按禮貴嫡重正所以尊祖禰繼世之正統也夫受重者不



得以輕服服之是以孫及曾元其爲後者皆服三年受重故也王敞云君爲祖三年旣爲君而有父祖之喪者謂父祖並有廢疾不得受國而已受位於曾祖者也范宣云嫡孫亡無後則次子之後乃得傳重以此觀之明嫡統不絕則旁支無繼襲之道然則令文所謂子孫承嫡者傳襲自嫡曾孫以下皆包之矣所以更言若無嫡子及有罪疾立嫡孫者嫌人無嫡子卽立嫡子之母弟或嫡子有罪疾并其嫡孫廢之故也又言曾孫以下準此者謂庶孫以上皆無卽立嫡曾孫之母弟無母弟卽立庶弟之類是也若令

文之意但以行尊屬近者爲嗣則無嫡子便應立嫡子母弟及庶子何爲更立庶孫也必若忠彥等所云則國家故事取本宮最長者一人封公已是行尊屬近之人便當遵行何必更有改作也彼令文所指者傳襲之人五服敕所載者喪服之制事理各殊豈可引喪服之庶孫證傳襲之庶孫也且造令之時王公以下薨則傳襲故必有立曾元者今諸王之薨已歷數世乃更追議當爲後之人則不應捨正統而更取旁支也今欲使合於古而適於今則莫若自國初以來於其人薨沒之時定當爲嗣者以至於今日



則於禮令不失而亦不離正統矣案秦王以雍熙元年薨  
於時嫡子德恭當立德恭以景德三年卒嫡長子承慶當  
立承慶以寶元二年卒無嫡子有庶子六人長曰克昭先  
卒無子次曰克繼當立楚王以某年薨嫡長子惟敘當立  
惟敘以大中祥符五年卒嫡子從煦當立從煦以慶歷五  
年卒無嫡子有庶子世逸一人當立魏王以某年薨無嫡  
子有庶子三人長曰允升以某年卒嫡子宗禮當立宗禮  
以治平二年卒嫡長子仲翹先卒無子次母弟仲髦亦先  
卒次母弟仲蒼當立以此考之其當爲後者豈不明白矣

所有承選雖是德文之嫡子其父元非嫡長子不應承襲  
蓋因今來承亮以庶孫得承襲故使承選有辭先王制禮  
皆本諸天地酌之人情譬如四支百體不可移也移之則  
綱紀紛亂爭端並興於承選可以見其驗矣臣等謹依古  
禮及令文并去年十一月十一日敕命閏十一月五日聖  
旨指揮檢詳屬籍重行定奪到秦王之後合以克繼襲封  
楚王之後合以世逸襲封魏王之後合以仲蒼襲封其餘  
並如衆禮官議所定

李僕射謚文恭議

穆



僕射稟秀美之氣涵純壹之德剛柔得中華實兼茂越自

衡華

舊本作泌

奮飛天朝回翔禁垣遂贊大政咨命不永奄忽

遷得自時迄今垂七十載令問休暢渙然未息紳弁之士  
流爲美談謹案謚法忠信接禮曰文不懈于位曰恭夫事  
親盡誠與人不欺行有標的言有規括忠信接禮之謂矣  
光輔神宗乂安四海邁其懿德倡率士民不懈于位之謂  
矣請謚曰文恭

錢中令謚宣靖議

若水

令公仁惠足以布政明智足以建功清修足以服人寬裕

足以容衆與物無競執議甚堅泊乎如淵撓不可濁介乎如石重不可移信尚德之君子全節之正人矣而又講學不倦好謀而成文以美身忠以贊國謹案諡法善問周達曰宣和德考衆曰靖令公論譔帝典發揮聖政使祖宗之烈燭耀無窮是不亦宣乎關領樞機謀謨帷幄六師輯睦夷夏乂安是不亦靖乎請諡曰宣靖

趙少傅諡僖質議

真

少傅體和居厚履恭涵壹言必有物動不邀名矯迹衡茅濯羽雲漢入贊樞極出殿藩維謹案諡法小心恭慎曰僖



言行相應曰質少傅內則造辟盡忠外則騰章建畫親昵  
有問應以他言可不謂僖乎歷事三朝始終一節不賁飾  
以譁衆不激訐以高人可不謂質乎請謚曰僖質

馮太尉謚勤威議

守信

昔者晉人不恭敢距大邦負固阻兵趙趙不庭太宗征之  
霆駭風趨狐狼之墟化爲樂都混一之勲太尉與焉獫狁  
孔熾整居幽冀縱騎鳴弦至于澶淵真宗一麾電卷雲披  
翦其酋豪馬潰麋逃底寧之功太尉在焉天下旣平蜚游  
不驚符瑞充盈登休薦成和鸞四巡萬乘星陳東暨云亭

西涉河汾警蹕之清太尉扈焉白馬之河漏爲橫波濟澤  
之阿閭殫可歌雲林什竹薪石相屬淵吐其陸萑萑衍沃  
隄防之勞太尉薰焉謹案謚法能修其官曰勤猛以彊果  
曰威迹其夙夜在公臨敵剛決榮祿昭融令問始終考於  
二法可謂協矣請謚曰勤威

辯

性辯

治平三年正月二十日作

孟子以爲人性善其不善者外物誘之也荀子以爲人性  
惡其善者聖人教之也是皆得其一偏而遺其大體也夫



性者人之所受於天以生者也善與惡必兼有之是故雖  
聖人不能無惡雖愚人不能無善其所受多少之間則殊  
矣善至多而惡至少則爲聖人惡至多而善至少則爲愚  
人善惡相半則爲中人聖人之惡不能勝其善愚人之善  
不能勝其惡不勝則從而亡矣故曰惟上智與下愚不移  
雖然不學則善日消而惡日滋學焉則惡日消而善日滋  
故曰惟聖罔念作狂惟狂克念作聖必曰聖人無惡則安  
用學矣必以愚人無善則安用教矣譬之於田稻梁藜莠  
相與並生善治田者耘其藜莠而養其稻梁不善治田者

反之善治性者長其善而去其惡不善治性者反之孟子以爲仁義禮智皆出乎性者也是豈可謂之不然乎然不知暴慢貪惑亦出乎性也是知稻粱之生於田而不知藜莠之亦生於田也荀子以爲爭奪殘賊之心人之所生而有也不以師法禮義正之則悖亂而不治是豈可謂之不然乎然殊不知慈愛羞愧之心亦生而有也是知藜莠之生於田而不知稻粱之亦生於田也故楊子以爲人之性善惡混混者善惡雜處於身中之謂也顧人擇而修之何如耳修其善則爲善人修其惡則爲惡人斯理也豈不曉



然明白哉如孟子之言所謂長善者也荀子之言所謂去惡者也楊子則兼之矣韓文公解楊子之言以爲始也混而今也善惡亦非知楊子者也

情辯

應幾有子生十年而喪之應幾悲哀甚旣而自諭曰是何益哉昔者吾嘗聞於有道者矣曰死而悲哀者情也死生有時短長有命知其物理之常不足悲者道也故其始也悲不自制情勝道也及其久也悲日益衰而理可以奪道勝情也予常以爲知言光辨之曰是非有道者之言也夫



情與道一體也何嘗相離哉始死而悲者道當然也久而  
寢衰者亦道當然也故始死而不悲是豺狼也悲而傷生  
是忘親也豺狼不可忘親亦不可是以聖人制服日遠日  
輕有時而除之若此者非他皆順人情而爲之也夫情者  
水也道者防也情者馬也道者御也水不防則汎溢蕩滴  
無所不敗也馬不御則騰突奔放無所不之也防之御之  
然後洋洋焉注夫海駸駸焉就夫道繇是觀之情與道何  
嘗交勝哉

司馬文正公集卷六十二終



